

**KBS Tiada Kuasa Pecat Pemimpin Persatuan - Ahmad Shabery  
Bernama  
22 Disember, 2011**

KUALA LUMPUR, 22 Dis (Bernama) -- Kementerian Belia dan Sukan (KBS) tidak ada kuasa untuk memecat mana-mana pemimpin persatuan sukan yang berhasrat untuk memimpin dalam satu tempoh masa yang lama, kata Menteriinya Datuk Seri Ahmad Shabery Cheek.

Beliau bagaimanapun mengingatkan semua pemimpin persatuan sukan supaya sentiasa menilai prestasi dan tahap pengurusan mereka sama ada telah menghasilkan kejayaan atau sebaliknya.

"Perkara ini terpulang kepada setiap persatuan namun pemimpin mereka khususnya perlu tepuk dada dan tanya selera, perlukah mereka memegang jawatan lama-lama namun tahap prestasi sukan tersebut merosot?" katanya ketika menjawab soalan tambahan daripada Senator Mohd Khalid Ahmad pada persidangan Dewan Negara di sini, pada Khamis.

Mohd Khalid ingin tahu mengenai pendirian KBS terhadap kemelut yang melanda beberapa persatuan sukan yang antaranya berpunca daripada keengganan pemimpin untuk meletakkan jawatan walaupun sudah didesak sehingga memberi kesan kepada kemerosotan sukan terbabit.

Ahmad Shabery berkata apa yang boleh dilakukan KBS adalah mengawal pemberian bantuan kewangan kepada mana-mana persatuan yang bermasalah.

Mengulas soalan tambahan Senator Datuk Mustafa Kamal Mohd Yusoff berhubung cadangan mengurangkan penglibatan ahli politik dan memberi lebih peluang kepada bekas atlet untuk menerajui persatuan sukan, Ahmad Shabery berkata tidak ada satu formula yang menyatakan bekas atlet atau bekas pengurus akan menjadi pemimpin yang baik.

Sebelum itu, menjawab soalan asal Senator Noriah Mahat berkenaan mekanisme pencarian ahli sukan terutama dari luar bandar, Ahmad Shabery berkata KBS sentiasa memperkasakan program kerjasama dengan Kementerian Pelajaran dan Kementerian Pengajian Tinggi dalam mengenal pasti atlet baru.

"Antara program usahasama yang paling berjaya adalah dengan pembinaan sekolah sukan di seluruh negara sejak tahun 1996 yang telah berjaya melahirkan atlet-atlet berprestasi tinggi serta mampu mengharumkan nama negara," katanya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=635880>